



Las soras enqueran personal per il mintgadi

Pervia dalla munconza da soras giuvnas ella claustra da Glion sto la gestiun dalla communidad dallas soras **dominicanas** encurir forzas da lavur ordeifer la claustra. Numerusas incumbensas en pliras spartas che vegnevan exequidas pli baul da conventualas pli giuvnas vegnan menadas oz da persunas d'ordeifer la claustra. Actualmein ei la la claustra da Glion alla tscherca d'ina menadra dalla veta da mintgadi.

MARTIN GABRIEL/FMR

«La piazza che nus havein scret ora dacuort ei buca ina funcziun diltut nova en nossa communidad», di sora **Annemarie Müller**, la priura generala dallas soras **dominicanas** da Glion. «Ei constat denton che nus havein creau ina nova piazza per ina secunda persuna da contact per las soras. Quella secunda menadra dalla veta da mintgadi vegn a surpender ina part dallas incumbensas da quella persuna ch'ei gia dapli l'entschatta d'uonn en funcziun sco menadra dalla veta da mintgadi.» La priura generala, sora **Annemarie Müller** di, che la communidad dallas **dominicanas** cun actualmein 73 soras a Glion drovi egl avegnir duas menadras dalla veta da mintgadi cun cun dus differentes ressorts. «Circa 50 da nossas 73 soras han 80 onns e dapli. Cun vegnir pli vegls ein

«Sco per biars auters attempai eisi era per nossas soras pli veglias buca pli pusseivel d'organisar terminis tier miedis, dentists ni el spital.»

Sora **Annemarie Müller**, priura generala dalla claustra da Glion

ins avisaus pli ditg e pli fetg a persunas giuvnas che segidan cun plaid e fatg.» E precis quella cussegliaziun e coordinaziun fetschien las menadras dalla veta da mintgadi.

Crear in mintgadi che fa senn

La priura generala declara alla FMR co la lavur dallas duas menadras dil mintgadi duess vegnir concedida. «Quella persuna ch'ei gia en uffeci dapi igl 1. da schaner 2023 vegn a s'occupar dapli dalla spiritualitad egl avegnir. Ella duei esser libra per menar discuors e per accompagnar las soras sche quellas

drovan agid.» La secunda menadra dalla veta da mintgadi seigi plitost l'organisatura che procuri per occurrenz ed occupaziuns accessorias per las soras attempadas. Tenor sora **Annemarie Müller** vegni la persuna ch'ins elegi proximamein era ad esser empau il motor per quellas soras che sappien buca organisar sezzas pli lur mintgadi. «Sco per biars auters attempai eisi era per nossas soras pli veglias buca pli pusseivel d'organisar terminis tier miedis, dentists ni el spital.» Alla fin finala seigi ei impurtont che era las soras attempadas e cun impediments sappien viver in mintgadi che fetschi senn.

Quota carschenta da soras attempadas

«Ella communidad dallas soras **dominicanas** da Glion mauncan las soras giuvnas», constatescha la sora Müller. «Nus essan mo paucas soras ella vegliadetgna denter 60 e 65 onns. E nossa media da vegliadetgna ei 84 onns. En nossa cuminonza datti paucas soras ch'ei aunc activas. Quellas soras che pon sorprendan denton aunc differentas incumbensas ch'ellas damognan el rom da lur forzas.» Per las lavurs ch'ins hagi publicau en la piazza da menadra dalla veta da mintgadi, detti ei neginas soras pli. Ed aschia hagi la cuminonza dallas soras deciduu da publicar quella piazza. Las menadras dalla veta dil mintgadi lavuran directamein el survetsch dallas soras. Ils ulteriurs emploiis d'ordeifer ein part dalla Fundaziun claustra dallas **dominicanas**. Tier las menadras dalla veta da mintgadi ei quei buca il cass.

80 persunas d'ordeifer

Ella claustra dallas **dominicanas** a Glion lavuran var 80 persunas d'ordeifer. Ils davos onns ei il diember d'employiadas carschius. Quei cunzun en las piazas dall'administraziun ed en la Casa Sentupada. En la partiziun da tgira, en cuschina ed el survetsch tecnic datti gia dapi plirs onns personal d'ordeifer. Tenor la priura generala sora **Annemarie Müller** ei igl interess per luvrar en ina piazza en claustra avon maun. Era per la piazza



d'ina menadra dalla veta da mintgadi hagi ins
survegniu pliras annunzias ch'ins vegni ad evalu-
ar las proximas jamnas. (fmr/mg)



Las soras **dominicanas** da Glion ein alla tscherca d'agid per dumignar il mintgadi.

FOTO MAD